

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

२२

पुष्पचूलियाणं-एककारसमं

इतंगमत्तं

मुनि दीपरत्नसागर

Date : / / 2012

Jain Aagam Online Series-22

२२**गंथाणुककमो**

कमंको	अज्झयणं	सुत्तं	गाहा	अणुककमो	पिडंको
१-१०	पढमं जाव दसमं -सिरि -हिरि -धिइ -कित्ति -बुद्धि -लच्छी -इलादेवी -सुरादेवी -रसदेवी -गंधदेवी	१-	१-	१-३	२

२२

पुप्फचूलियाणं-एककारसमं उवंगसुत्तं

१-१० अज्झयणाणि

[१] जइ णं भंते! समणेणं [भगवया महावीरेणं जाव संपत्तेणं उवंगणं तइयस्स वग्गस्स पुप्फियाणं अयमद्वे पन्नत्ते, चउत्थस्स णं भंते! वग्गस्स पुप्फचूलियाणं समणेणं भगवया महावीरेणं जाव संपत्तेणं कइ अज्झयणा पन्नत्ता ? एवं खलु जंबू! समणेणं भगवया महावीरेणं जाव संपत्तेणं पुप्फचूलियाणं] दस अज्झयणा पन्नत्ता तं जहा ।

[२] सिरि-हिरि-धिइ-कित्ति-बुद्धि-लच्छी य होइ बोद्धवा ।

इलादेवी सुरादेवी रसदेवी गंधदेवी य ॥

[३] जइ णं भंते! समणेणं भगवया महावीरेणं जाव संपत्तेणं उवंगणं चउत्थस्स वग्गस्स पुप्फचूलियाणं दस अज्झयणा पन्नत्ता, पढमस्स णं भंते [अज्झयणस्स पुप्फचूलियाणं समणेणं भगवया महावीरेणं जाव संपत्तेणं के अद्वे पन्नत्ते ?], एवं खलु जंबू! तेणं कालेणं तेणं समएणं रायगिहे नयरे गुणसिलए चेइए, सेणिए राया, सामी समोसाढे, परिसा निग्गया,

तेणं कालेणं तेणं समएणं सिरिदेवी सोहम्मए कप्पे सिरिवडिंसए विमाने सभाए सुहम्मए सिरिवडिंसयंसि सीहासणंसि चउहिं सामानियसाहस्सीहिं चउहिं महत्तरियाहिं सपरिवाराहिं जहा बहुपुत्तिया जाव नट्टविहिं उवदंसित्ता पडिगया नवरं दारियाओ नत्थि पुव्वभवपुच्छा,

एवं खलु गोयमा! तेणं कालेणं तेणं समएणं रायगिहे नयरे, गुणसिलए चेइए, जियसत्तू राया, तत्थ णं रायगिहे नयरे सुदंसणे नामं गाहावई परिवसई अइडे० तस्स णं सुदंसणस्स गाहावइस्स पिया नामं भारिया होत्था सोमालपाणिपाया० तस्स णं सुदंसणस्स गाहावइस्स धूया पियाए गाहावइणीए अत्तया भूया नामं दारिया होत्था वुड्ढा वुड्ढकुमारी जुण्णा जुण्णकुमारी पडियपुत्थणी वरगपरिवज्जिया यावि होत्था,

तेणं कालेणं तेणं समएणं पासे अरहा पुरिसादानीए जाव नवरयणिए वण्णओ सो चव, समोसरणं, परिसा निग्गया, तए णं सा भूया दारिया इमीसे कहाए लद्धट्टा समाणी हट्टुट्टा जेणेव अम्मपियरो तेणेव उवागच्छइ उवागच्छित्ता एवं वयासी- एवं खलु अम्मताओ! पासे अरहा पुरिसादानीए पुव्वाणुपुव्विं चरमाणे जाव देवगणपरिवुडे विहरइ, तं इच्छामि णं अम्मताओ! तुब्भेहिं अब्भणुण्णाया समाणी पासस्स अरहओ पुरिसादानीयस्स पायवंदिया गमित्तए, अहासुहं देवाणुप्पिए! मा पडिबंधं० ।

तए णं सा भूया दारिया ण्हाया अप्पमहग्घाभरणालंकियसरीरा चेडीचक्कवालपरिकिण्णा साओ गिहाओ पडिनिक्खमइ पडिनिक्खमित्ता जेणेव बाहिरिया उवट्टाणसाला तेणेव उवागच्छइ उवागच्छित्ता धम्मियं जाणप्पवरं दुरूढा ।

तए णं सा भूया दारिया नियगपरिवारपरिवुडा रायगिहं नयरं मज्झंमज्झेणं निग्गच्छइ निग्गच्छित्ता जेणेव गुणसिलए चेइए तेणेव उवागच्छइ उवागच्छित्ता छत्तादीए तित्थकरातिसए पासति, धम्मियाओ जाणप्पवराओ पच्चोरुमित्ता चेडीचक्कवालपरिकिण्णा जेणेव पासे अरहा पुरिसादानीए तेणेव

उवागच्छइ उवागच्छित्ता तिक्खुत्तो जाव पज्जुवासइ, तए णं पासे अरहा पुरिसादानीए भूयाए दारियाए तीसे य महइमहालियाए परिसाए धम्मं परिकहेइ धम्मं सोच्या निसम्म हट्टुट्टा० वंदइ नमंसइ वंदित्ता नमंसित्ता एवं वयासी- सद्धहामि णं भंते! निग्गंथं पावयणं जाव अब्भुट्टेमि णं भंते! निग्गंथं पावयणं से जहेयं तुब्भे वयह जं नवरं भंते! अम्मापियरो आपुच्छामि तए णं अहं जाव पव्वयामि, अहासुहं देवाणुप्पिए! मा पडिबंधं० ।

तए णं सा भूया दारिया तमेव धम्मियं जाणप्पवरं दुरूहइ दुरूहित्ता जेणेव रायगिहे नयरे तेणेव उवागया रायगिहं नयरं मज्झमज्झेणं जेणेव सए गिहे तेणेव उवागया रहओ पच्चोरुहित्ता जेणेव अम्मापियरो तेणेव उवागया करयल [परिग्गहियं दसनहं सिरसावत्तं मत्थए अंजलिं कट्टु] जहा जमाली आपुच्छइ, अहासुहं देवाणुप्पिए! तए णं से सुदंसणे गाहावई विउलं असनं० उवक्खडावेइ, मित्त-नाइ० आमंतेइ आमंतेत्ता जाव जिमियभुत्तुत्तरकाले सुईभूए मित्त नाइ० समणित्तो कोडुंबियपुरिसे सद्दावेइ सद्दावेत्ता एवं वयासी- खिप्पामेव भो देवाणुप्पिया! भूयाए दारियाए पुरिससहस्सवाहिणिं सीयं उवट्टवेह जाव पच्चप्पिणहं,...

तए णं ते कोडुंबियपुरिसा तमाणत्तियं पच्चप्पिणंति, तए णं से सुदंसणे गाहावई भूयं दारिय णहायं जाव सव्वालंकारविभूसियसरीरं पुरिससहस्सवाहिणिं सीयं दुरूहेइ दुरूहेत्ता मित्त-नाइ० जाव दुंदुहि-निग्घोसणाइयरवेणं रायगिहं नयरं मज्झमज्झेणं जेणेव गुणसिलए चेइए तेणेव उवागए छत्तातीए तित्थयरातिसए पासइ पासित्ता सीयं ठवेइ ठवेत्ता भूयं दारियं सीयाओ पच्चोरुहेइ० ।

तए णं तं भूयं दारियं अम्मापियरो पुरओ काउं जेणेव पासे अरहा पुरिसादानीए तेणेव उवागया, तिक्खुत्तो वंदंति नमंसंति वंदित्ता नमंसित्ता एवं वयासी- एवं खलु देवाणुप्पिया! भूया दारिया अम्हं एगा धूया इट्टा, एस णं देवाणुप्पिया! संसारभउत्विग्गा भीया जम्मणमरणाणं देवाणुप्पियाणं अंतिए मुंडा भवित्ता अगाराओ अणगारियं पव्वयाइ, तं एयं णं देवाणुप्पियाणं सिस्सिणीभिकखं दलयामो, पडिच्छंतु णं देवाणुप्पिया! सिस्सिणिभिकखं, अहासुहं देवाणुप्पिया! तए णं सा भूया दारिया पासेणं अरहा० एवं वुत्ता समाणी हट्टुट्टा उत्तरपुरत्थिमं दिसीभागं अवक्कमइं अवक्कमित्ता सयमेव आभरणमल्लालंकारं ओमुयइ जहा देवानंदा पुप्फचूलाणं अंतिए जाव गुत्तबंभयारिणी,

तए णं सा भूया अज्जा अन्नया कयाइ सरीरबाओसिया जाया यावि होत्था- अभिकखणं- अभिकखणं हत्थे धोवइ पाए धोवइ सीसं धोवइ मुहं धोवइ थणगंतराइं धोवइ कक्खंतराइं धोवइ गुज्झंतराइं धोवइ जत्थ-जत्थ वि य णं ठाणं वा सेज्जं वा निसीहियं वा चेएइ तत्थ-तत्थ वि य णं पुव्वामेव पाणएणं अब्भुक्खेइ तओ पच्छा ठाणं वा सेज्जं वा निसीहियं वा चेएइ ।

तए णं ताओ पुप्फचूलाओ अज्जाओ भूयं अज्जं एवं वयासी- अम्हे णं देवाणुप्पिए! समणीओ निग्गंथीओ ईरियासमियाओ जाव गुत्तबंभयारिणीओ, नो खलु कप्पइ अम्हं सरीरबाओसियाणं होत्तए, तुमं च णं देवाणुप्पिए! सरीरबाओसिया अभिकखणं-अभिकखणं हत्थे धोवसि जाव निसीहियं चेएसिं, तं णं तुमं देवाणुप्पिए! एयस्स ठाणस्स आलोएहिं० सेसं जहा सुभद्दाए जाव पाडिएक्कं उवस्सयं उवसंपज्जित्ताणं विहरइ ।

तए णं सा भूया अज्जा अनोहट्टिया अनिवारिया सच्छंदमई अभिकखणं-अभिकखणं हत्थे धोवइ जाव निसीहियं वा चेएइ, तए णं सा भूया अज्जा बहूहिं चउत्थ-छट्ट-[इम-दसम-दुवालसेहिं

मासद्ध-मासखमणेहिं विचित्तेहिं तवोकम्मेहिं अप्पाणं भावेमाणी] बहूइं वासाइं सामण्णपरियागं पाउणित्ता तस्स ठाणस्स अनालोइयपडिक्कंता कालमासे कालं किच्चा सोहम्मे कप्पे सिरिवडेंसए विमाने उववायसभाए देवसयणिज्जंसि जाव ओगाहणाए सिरिदेवित्ताए उववन्ना पंचविहाए पज्जत्तीए जाव पज्जत्तभावं गया, एवं खलु गोयमा! सिरीए देवीए एसा दिव्वा देविड्ढी लद्धा पत्ता०, ठिई एगं पलिओवमं ।

सिरी णं भंते! देवी [ताओ देवलोगाओ आउक्खएणं भवक्खएणं ठिइक्खएणं अनंतरं चयं चइत्ता] कहिं गच्छिहिइं कहिं उववज्जिहिइ ? गोयमा! महाविदेहे वासे सिज्झिहिइ एवं खलु जंबू! [समणेणं भगवया महावीरेणं जाव संपत्तेणं पुप्फचूलियाणं पढमस्स अज्झयणस्स अयमट्ठे पन्नत्ते त्ति बेमि]

०-० एवं सेसाण वि नवणं भाणियव्वं, सरिनामा विमाना सोहम्मे कप्पे, पुव्वभवे नयरचेइयपियमाईणं अप्पणो य नामाइं जहा संगहणीए, सव्वा पासस्स अंतिए निक्खंता, पुप्फचूलाणं सिस्सिणीयाओ, सरीरबाउसियाओ, सव्वाओ अनंतरं चयं चइत्ता महाविदेहे वासे सिज्झिहिंति ।

मुनि दीपरत्नसागरेण संशोधिताः सम्पादिताश्च “पुप्फचूलियाणं- उवंगसुत्तं” सम्मत्तं

२२

पुप्फचूलियाणं- एककारसमं उवंगसुत्तं
सम्मत्तं